



M. 9. 1786.

PK

Konigstein bei Ohlweis.

1572-1619.

1) - 74)

PK (14)

4
Gründlicher vnd warer Bericht / M^o 176
Von dem neuen Cometstern / so in der
Luft vnter dem Himmel gesehen / nach dem
Niedergang der Sonnen / in October vnd
Novemb. des M. DC. IV. Jahrs.

Jderman zu getrewer Warnung / mit vleis be-
schrieben vnd an Tag gegeben / Durch
M. Albinum Mollerum von Straupitz / in dem Marggraff-
thumb Niederlausitz / alten Theologum vnd Astronomum.



Erslich Gedruckt zu Eisleben durch Jacobum Gaubisch /
Im M. DC. V. Jahrs



Dem Bestrengen / Edlern
vnd Ehrnvesten / Junckhenn GE-
ORGIO CASPARO von Minckwitz /
Erbhenn auff Lindenaw / in dem Marggraffthumb De-
berlausitz / etc. Seinem großgünstigen Herrn
vnd mechtigen Patronen vnd
Förderer.

Zu sonderen Ehren vnd glückseliger
Wolfarth gestellet / zugeschrieben
vnd verchret / Durch

G. G.

Getrewen vnd allezeit
Dienstwilligen:

Magistrum Albinum Mollerum
von Straupitz / in dem Marg-
graffthumb Niderlausitz / alten
Theologum vnd Astrono-
rum.



Gründlicher vnd wa-
rer Bericht / von dem newen Cometen-
stern/so von mir vnd andern mehr/erstlich ersehen
den Sontag nach alten Michael / oder den 10. Tag
newen Octob. vmb 6. Stund 10. Minut. auff den A-
bend/an dem Himmel/ gleich mit dem Planeten Mars
vnd Jupiter / in dem achten Hause des Todes / nicht
weit vom Saturno in dem Schützen/der in etlichen wo-
chen daher an dem Himmel erschrecklich herein gefün-
ckelt/ viel grösser als kein Planetenstern / Nach dem
Nidergange der Sonnen des
1604. Jahres.

Die alten Hochgelarten vnd Wol-
erfahrenen Sternseher haben die Com-
etensternen vnterschieden in dreyer-
ley Art: Als in Bärtige / Schwänkige
vnd runde Cometen/ so da Sternen ges-
nennet / Nicht darumb / als weren sie
rechte / oder von neues geschaffene
Sternen / sondern das solche dem Gesichte nach anzusehen/
gleich den Sternen/ vnd viel grösser als kein Planetenstern/
da doch solche Cometensternen formiret werden aus irrdi-
scher trockener Exhalation in suprema aeris Regione,
auch alda so lange weren zusehen / bis die trockene Exhala-
tion verbrennet vnd nicht mehr in die Lufft ascendiret, ex
terra in supremam aeris Regionem, in welcher oberster
Lufft

Gründlicher vnd warer Bericht/

Lufft Region allerley ignita metheora formiret vnd gewircket werden / vnter welchen die Cometensternen die Fürnehmsten seind / bekommen auch ihren Nahmen von den zu nächste wirkenden vnd in flammirenden Planetensternen.

Dieweil dann in obgemelter zeit der newe Cometenstern ohne Bart vnd Schwanz / doch viel grösser als kein Planetenstern / erschienen in der Lufft zu nächst an dem Himmel vber den Planetenstern Mars vnd Iupiter, nicht weit von Saturnen, zu mittel des Himlischen Schützen/ sich daraus nicht verrücket / sondern alda unbeweglich blieben/ der Iupiter aber vnd Mars dauon weiter gerücket in ihrem natürlichen Lauffe / Ab occasu in Orientem, vnd zu vnter schieden gegeben solchen newen Cometenstern/ so wird derselbe genennet ein runder Cometenstern / Cometa Iouialis & Martialis, stella crinita argentea & Lampas, wie er denn von den gemischeten Farben des Iupiters vnd Mars, gleich als eine runde brennende Lampe / daher erschrecklich vnd viel grösser als dazumals die vnter ihme lauffenden Planetensternen Mars vnd Iupiter, herein gefünckelt / vnd gesehen vber den Mars vnd Iupiter, sonst (weil er ohne Bart vnd Schwanz ganz rund erschienen) were solcher runder Cometenstern nicht so leichtlich erschen / viel weniger erkandt worden/vorab von den Vnerfahrenen solcher Dingen vnd Sachen.



Von

Von dem neuen Cometenstern

Von den Bedeutungen
des neuen runden Co-
metenstern.



Vwol Anno Christi 1572. fast glei-
cher runder Cometenstern argenteus vel ro-
leus erschienen / vnter den Witternechtigen
Sternen der Himlischen Cassiopeia, vnd
darauff rechte offenbar worden / die ergerliche
vnd schedliche Irrhüme der Calvinisten / von der heiligen
Person Christi / Lauff vnd Abendmal des HErrn / vnd von
andern Artickeln Christlicher Lehren / mit frem eigenen Hon /
Spot / Schaden / Verderbnuß vnd Vntergang / beneben an-
derm grossen Vbel vnd Vnglücke mehr / so seind doch die Bes-
deutungen des neuen runden Cometenstern viel grösserer ers-
schrecklicher / trawriger vnd schedlicher / aus vrsachen / das sol-
cher fewriger Cometstern vnter dem Himmel in der Lufft / in dē
8 Hause des Todes erschienen (respectu visus nostri) vber
der grossen Coniunction der dreyer obern Planetensternē des
Mars, Iupiter vnd Saturnus in Sagittario, nicht weit von
Ecliptica der Sonnēstrassen / gleich als der 4. aller gröste vnd
oberste Planetenstern / der die andere 3. obern Planetenstern /
auch in dem 8 Hause des Todes / den Mars, Iupiter vnd Sa-
turnen alle weggreumen / vberweltigen vnd zerstören wollen /
vnter der Constellation des Himlischen Schütze / zum theils
auch Scorpions / gleich als der Monde auffgangen / mit dem
Himlischen Stieren / nahe bey dem schedlichen Stern Al-
gol, Die Venus vnd Sonne cum spica Virginis, auch
der Mercurius cum lancibus Librae, gelauffen in 6. lan-

Gründlicher vnd warer Bericht /

eo morborum, vitiorum, servorum & vicinorum, auch darauff den 14. alten / oder 24. Tag newen Octob. erfolget vnd gesehen worden / solche Chasmata magna, fewrige Stralen in der Luffte / vnd Himmels Zeichen (dergleichen zuvor niemals gesehen) so den newen Cometenstern / vnd darbey die drey obern Planetsternen Saturnus, Iupiter vnd Mars, in dem ganzen Himmel / von allen vier Orten der Welt / vmbbringet / gleich als viererley Kriegsbeer / von Aufgange / Mittage / Niedergange der Sonnen / Mitternacht / vnd folgendes Montages den 15. alten / oder 25. Tages newen Octob. zu Nacht der zunehmende Monde kommen gelauffen zu dem Saturnen Cometenstern / Iupiter vnd Mars in Sagittario, gleich als den andern zu Rathe vnd zu Hülffe / das angezündete Feuer zu leschen / (darzu denn auch wol kommen kan die Sonne / Saturnus, Mercurius vnd Venus) da denn so ein grosses / erschreckliches vnd vngewöhnliches Zeichen an den dreyen obern Planeten / newen Cometenstern vnd fewrigen Stralen in der Luffte / das von Anfang der Welt bis daher nicht geschehen / vnd ist möglich nicht mehr dergleichen im Schützen geschehen werde.

Hab derowegen für gut angesehen / solches alles desto zeitlicher an Tag zu geben / auff das wer noch nicht solchen newen Cometenstern gesehen / derselbe gerursachet werde / darnach zufragen / vnd den anzusehen nach dem Niedergange der Sonnen / viel grösser als der Iupiter vnd Saturnus, vnd so ihn die Coniunctio der Sonnen vnd Saturnen im Schützen (da er sich verbergen wird) nicht ganz vnd gar dempffet / so kan er auch wol weiter gesehen werden / des Morgens frühe / zwischen dem Morgenstern vnd Saturnen / vor der Sonnen Aufgange / wann denn solches geschieht / so werden dessen Bedeutungen desto schwerer vnd grösser sein / betreffende alle Stende der Menschen, das denn in guter acht zu nehmen nötig vnd nützlich:

Nach

Von dem neuen Cometenstern.

Nach der Astrologischen Lehren aber des fürnemeisten /
Hochberühmten Astronomi Ptolomei principis Astro-
logorum, vnd anderen alten Hochgelarten vnd wolerfahre-
nen Sternsehern / werden dardurch gedeutet / der Tod eines
gewaltigen Königes oder Fürsten / beneben vielen tödlichen
Kranckheiten / schneller Tod etlicher vornehmer hohen Per-
sonen / Verenderungen der Herrschafften / Entsetzungen ih-
rer vieler von ihren Ehrenempthern / beydes in geistlichen vnd
weltlichen Stenden / Verenderungen in der Religion / vnd
hierauff ein grosses vnd vnerhörtes Unglücke / da denn die
ernste straffe Gottes ergehen werde / vber die in allen Reichs-
tagen verdampften Calvinisten / wil geschweigen / was sich
erheben mag / wegen alter Landes Gerechtigkeit / Privilegi-
en / Geistlicher vnd Klöster Güter / Erbgüter / Land vnd Leu-
ten / vnd wegen angestiffter Gewalt / Sresel / Mordbrenner
vom Türcken / oder von andern öffentlichen vnd heimlichen
Feinden / mit grosser Vntrew vnd Verretheren / etc.

Darauff denn / beneben dem Türcken Kriege / erfolgen
kan ein schedlicher Fürstenkrieg / mit erschrecklichem Auf-
ruhr / Morden / Rauben / Brennen / Zehwerzeit / Pestilenz /
auch vnter den Eheleuten vnd Nachbarn / grosses vnd an-
sehliches Geschlechtes / viel Zankes / Haders / Grols / Sech-
ten vnd Rechten nun mehr zuerfahren / wegen Haab vnd
Gut / Brennen / Holsungen / Jaget / Vogelfangs / Fischerey-
en / mit grosser Vntrew vnd Bosheit der Knechten vnd
Hausgesinde / so ihren Herren vnd Frauen heimlich nach-
stellen werden.

Da denn auch vbel stehen werden das Wildnis vnd Bes-
derviehe / vnd die grossen Wildjeger auff der Jagt ein bes-
sonders Unglücke zu erfahren / oder zu verhüten haben / auch
anders Unglücke vnd Vbel mehr gedrewet / vnd treffen wird
am meisten das Land Ungern / Siebenbürgen / Zipsen /
Mähren /

Gründlicher vnd warer Bericht/

Mehren / Hispanien mit den vier Königreichen Castilien / Gallicien / Navarren vnd Catellonien / das ander Theil Frankreichs Celtica / auch Dalmatien / Slavonien / das Land Meissen / Sachsen / Marcke / Schweden / Polen vnd ander mehr vnter dem Himlischen Schützen / Steinbock / Scorpien vnd Stieren / zum theils auch vnter den Zwillingen / Krebs / Lewen / Jungfrauen vnd Fischen / da denn auch dessen Unglückes in guter Acht zu nehmen hat / die Stad Olmitz in Mehren / die Königliche Hauptstad Praga in Böhmen / Dresden in Meissen / so wol Leipzig / Wittenberg / Magdeburg / Dessau / Zerbst / vnd andere mehr gegen dem Decident / vorab an den Orten da der Calvinismus vberhand nimmet / so sollen auch ihrer Schanzen eben war nehmen die in nieder vnd ober Lausitz / zu Lubben vnd Budissin in Schlesien vnd andere benachbarte Lender vnd Stedte / vnter den obgedachten Zeichen / etc.

Insonderheit wird dardurch gedreuet / Beraubunge der Güter / Tod vnd Vntergang mit Befengniß etlicher Iouialischer / Martialischer vnd Saturnischer / so wol Lunarischer Personen hohes vnd nidriges Standes / auch grosse Gefahr etlicher statlicher Widfrauen / Legaten vnd Kauffherren verderbnuß / *Causa Religionis ac iusticiae violatae, &c.*

Darumb denn etliche Geistliche Herrn vnd Prelaten / Bischoffe vnd Doctores, auch etliche Fürsten / Graffen vnd grosse Herrn / ihre Kethe / statliche vom Adel vnd Amptsleute / mit den Religionsfachen Rechtsfachen / Ehesachen / Gesetzen / Statuten / Gewohnheiten / Privilegien / Lehnrechten / Erbgüter / Klostersgüter / vnd mit allen andern dingen vnd Sachen / vorsichtig vnd wolbedacht sam handeln vnd wandeln sollen. Denn es werden die jenigen am meisten in größten Schaden / Verderbnuß vnd Gefahr kommen / so da in der Bedeutungen des Jupiters / Mars / Saturnen vnd Monden /

Von dem neuen Cometenstern.

den / vnd die in ihrem Nativitet befinden den Schützen im dem ersten oder zehenden Hause der Geburts vnd Himmels Figuren Rational, oder auch in gleichen Zeichen haben das Glückrad / die Himlischen Liechter / oder andere fürnehmste Planeten vnd Significatores vitæ & fortunæ, honorum atq; dignitatum, solche sollen sich allenthalbē gar wol versehen / vnd vermeiden / den verdampften Calvinismum, der auch endlichen wird vntergehen / vnd seine Straffe haben / von Gott dem Herzenkündiger vnd gerechtem Richter.

Den so man alle Himlische Zeichen vnd getreue Warnungen verachtet / sich daraus nicht bessert / sondern viel erger wird / so müsse Gott straffen / wie die vorstockten Jüden / vnd zu lezt mit dem jüngsten Tage darcin schlagen.

So wird auch dardurch gedrewet dem gemeinem Volke / armen Vnterthanen / Bürgern vnd Bawern / auch den Handwerkern / Kremern ond Hendlern / in Stedten vnd Dörffern / so viel Unglücks / Jammers vnd Elendes / in etlichen zukünfftigen Jahren / das nicht zu erzehlen / wegen der Religion, Gerechtigkeit / Schakungen / Krieg / Auffruhr / Mord / Raub / Brand / Thewerzeit / Kranckheiten vnd Sterbensgefahr / vnangesehen das etliche Astronomi vermeinen / das auch durch solchen Jovialischen vnd Martialischen Cometenstern im Schützen das Vbel solte gelindert / der Krieg vertragen / vnd aller Streit in Religions sachen vnd Kirchen Ordnungen hingelegert vnd gestillet werden. * cum victoria correcti Calendarij, auch gute fruchtbare Jahre folgen / so wird doch solches nicht vberall geschehen oder bestand haben / angesehen die Bosheit des Martis vnd Saturni, so damit Gewalt vber den verdampften Calvinismum hasten / doch zu lezte vntergehen werde.

¶

Quia

Gründlicher vnd warer Bericht/

Quia veritas premi, aut opprimi non potest. Et tandem bona causa triumphat, &c.

Vnd ob auch wol ein frommer Fürst/ Herre vnd Regente habe iustam causam movendi bellum, pro legitima defensione, & pro Lege ac Grege, so solle es doch heissen:

In allen dingen wol bedacht/

Hat es niemals Schaden gebracht.

Quia bellum movere facile est, sed sedare bellum difficile esse constat ex historijs publicis, &c.

So spricht auch der Heide Virgilius:

Nulla salus bello, pacem te poscimus omnes,

Das ist:

Es ist kein Heil noch nutz im Krieg/

Wer Frieden helet/ der hat den Sieg.

Selig seind derowegen die Friedfertigen/ so den schönen Frieden lieben/ alles zum besten kehren vnd zum Friede raten. Denn solche werden Gottes Kinder heissen/ Matth. 5.

Es sollen auch die Christlichen Regenten/ Herren vnd Amptleute gegen den armen Unterthanen sich dermassen erzeigen/ das Gott daran ein Wohlgefallen haben möge/ beydes was anlanget das heilige Wort Gottes/ rechter Verstand vnd Gebrauch der heiligen Sacramenten/ vnd ihre arme Nahrungen helfen befördern vnd schützen/ nicht in Grund verderben/ auch hierbey zuerinnern haben von ihrer Sterblichkeit/ vnd von dem jüngsten Tage/ Luc. cap. 21. Es werden Zeichen geschehen an der Son/Mon
vnd

Von dem neuen Cometenstern.

vnd Sternen/vnd die Krefte des Himmels werden sich bewegen/ ehe denn da kömmet der erschreckliche Tag des HERN.

Vnd dz die letzten Zeiten vnd Tage so arg vnd geschwinde sein werden/ das kurz vor dem jüngste Tage/gemeine werden solle/ solche süchte Irthümbe (als eben seind der Calvinisten)blindheit vnd Verstockunge: Das wo es möglich/ auch die Außgewählten darein sollen verführet werden/ Matth. cap. 24. Also grosse vnd schwere Irthümbe vnd Straffe Gottes/das/wenn der HERN Christus kommen wird zu richten die Lebendigen vnd die Todten/ er keinen wahren Glauben finden werde/ bey den Menschen Kindern auff Erden/Luc. cap. 13. O tempor, ad mores, o Religio! Das lasset euch keinen Scherz sein/ sondern lasset euch solches zu Herzen gehen / vnd Busse thun / etc.

Quia Deus potest imperare causis secundis, & precatio iusti multum poterit, atq; sato prudentia maior, &c

II.

Weiter ist zu mercken das / ob wol durch den neuen Cometenstern / beneben den wirkenden drey obern Planeten Saturnen, Iupiter vnd Mars, ein vnbessendiges Gewitter gefunden/ so kan doch ratione Cometa in Sagittario, signo calido ac sicco, darauff erfolgen ein trockenes & klares Wetter/ hartfröstiger Winter mit den scharffen Winden Osten vnd Norden/ auch in etlichen nachfolgenden Jahren zu befürchten/ grosse Trockeneit mit Vnsfruchtbarkeit der Erden vnd Beumē / Mißwachs am Ackerbaw / Schaden vnd Verderbnis am Bergwerck/ so fern solches Vbel (nechst Gott vnd dem Christlichen Gebete) nicht gelindert

W i j

gelindert

Gründlicher vnd warer Bericht /

gelindert werde (wie auch oben gemeldet) das etlicher Me-
nungen sey / das durch solchen Jovialischen vnd Martialischen
neuen Cometenstern / alles Ubel vnd Unglücke solle gelin-
dert vnd gestillet werden / darzu der Allmechtige gültige Gott
seine Gnade vnd Segen geben wolle / Amen.

III.

Vor die Gelehrten besondere Aphorismi, von dem neuen runden Co- metenstern im Schützen / nach der Meinunge Ptolomæi / vnd anderen Stern- sehern.



S Tella crinita vel orientalis, aut occidentalis
significat mortem alicuius Regis vel Prin-
cipis, &c.

C Ometa in Sagittario signo humano, minatur neces-
sitas ac interitum Regibus, Principibus & hominibus, et-
iam incommoda Venatorum, nec non damna volu-
crum, quæ sunt in maximo usu, &c.

I Lle Cometa rotundus primò visus sub coelo in octava
domo mortis, significat mutare administrationes pu-
blicas, & magistratus, cum morbis plurimis, ac morte
repentinâ illius populi, in cuius signo conspicitur, ni-
mirum sub Sagittario, &c.

Iste

Von dem neuen Cometenstern.

Iste Cometa Iouialis etiam in Sagittario signo Iouiali, significat mutationes in Religione, vel Religionis, legum, statutorum, priuilegiorum, nec non infinita mala causâ Religionis ac Iusticiæ violatæ, &c.

Cometa Lampas in Sagittario, eleuatus supra Martem, Iouem & Saturnum, adueniente Lunâ in Sagittario, minatur neces ac interitum Iouialibus, Martialibus, Saturninis atq; Lunaribus hominib. magnæ famæ, & qui administrant officia publica, &c.

Itaq; patietur detrimentum omne id, quod subijci-
tur Ioui, Marti, Saturno & Lunæ, &c.

Ista stella crinita apparens in Sagittario, significat, quod in partibus Regni Babylonici & terra Baldasz morbi Ephimediales, & mors plurima erit, Rex quoq; istius imperij, extremam diem claudet, id est morietur, teste Albohzenhalio, &c.

CL. Ptolomæi Centiloquio, Cometa apparens in loco declinante, vel in octaua domo mortis, significat morbes plurimos, ac repentinas mortes, & quia ille Cometa argenteus in Sagittario, etiam in octaua domo mortis fuit immobilis, minari videtur aduenturum prouincialem hostem, vel significat clandestinos motus, incendia & bella civilia, Fürstentrieg / atq; alia plurima mala, causâ Religionis & Iusticiæ violatæ, &c.

In Summa es sey ein Comete stern wie er wolle / bar-
batus, caudatus vel rotundus, ehnlich einer bren-
nendem

Gründlicher vnd warer Bericht/

nenden Lampen / oder klaren Rosen/ so erscheinet doch keines
vergeblich / sondern er bringet allezeit mit sich tödtlichen Ab-
gang hoher Heupter / Verenderungen der Herrschafften /
Vnglücke in Religion/ Gesezen / Statuten / Privilegien /
Krieg/ Aufruhr / Raub/ Mord/ Fenersbrand/ Trockenheit/
Unfruchtbarkeit / Theurzeit / Hunger vnd Starben / vnd
anderes Vnglücke mehr/ wie auch solches offenbar von den
schwensigen Cometenstern des 1577 vnd 1596. Jares/ was
darauff erfolget in Vngern/ Hispanien/ Franckreich/ Nider-
land/ Westphalen / Marcke/ Schweden/ Polen/ vnd in an-
deren Orten mehr/ das ist man noch wol eingedencke. Also
wird auch auff diesem neuen Cometenstern im Schützen /
dergleichen/ vnd noch viel grösseres Vnglücke gedrewet/ vnd
etwas besonders neues zubefürchten / das noch niemals er-
fahren worden/ etc.

Ob auch wol in meiner Practica Astrologica Anni
1604 zuuor prædiciret, das ein neuer Cometenstern vnd
andere grosse Himmels Zeichen / als Chalmata & Parelia
kommen würden/ so geschehen doch solche Zeichen aus sondera-
licher Zuschickunge Gottes/ vnd seind Vordoten beydes Got-
tes Zorns vnd Straffen/ vnd des zunahenden jüngsten Tas-
ges/ ist der frommen Christen Erlösunge / vnd der Gottlosen
Verdammis/ Matth. cap. 24. vnd Luc. cap. 21. etc.

Verhalben merckende auff den neuen Cometenstern vnd
offte geschehenen Fenerstralen/ drey Sonnen/ vnd etliche er-
schreckliche vngewhre Geburten / lasset vns in warer Busse
wachen vnd beten / auff das wir allem Vbel so da kom-
men sol auff Erden / entfliehen / fromm vnd selig
werden / durch Jesum Christum vnsern

Herren vnd waren Heyland/

Amen/ Amen.

in








Inches 1 2 3 4 5 6 7 8
Centimetres 1 2 3 4 5 6 7 8 9 10 11 12 13 14 15 16 17 18 19

B.I.G.

Farbkarte #13



4
er vnd warer Berichte / *Mg 476*
n Cometstern / so in der
Himmel gesehen / nach dem
r Sonnen / in October vnd
des M. DC. IV. Jahrs.
wer Warnung / mit vleis bes
an Tag gegeben / Durch
von Straupih / in dem Marggraff
alten Theologum vnd Astronomum.



is leben durch Jacobum Gaubisch /
M. DC. V. Jahr.

